

PRAEFATIO.

BIBLIOPOLA LECTORI
SALUTEM.

EX quo animum ad novam Celsi editionem adjeci, deficiente, qui limam ei adhiberet, homine erudito, id mihi negotii datum esse intellexi, ut clarorum virorum notas, quarum tantum eclogas dederat Almeloveenius, jam tandem integras in editione mea exhiberem. Neque id sine ratione a me factum esse scito. Diu enim est, quod intellexi, non amplius editionem commodioris formae desiderari, (quarum copia paene abundamus) sed majorem aliquanto, & luculentior, iisque instructam rebus, quae sive ad explicandum sive ad emendandum auctorem tam male a librariis acceptum pertinere videantur. Hac igitur mente Joannis Caesarii, praestanti eruditione viri, & Roberti Constantini, quo nemo plures foedioresque Celsi maculas absterfit, annotationes hac revocavi omnes. Quorum quidem editiones, paucorum manibus tritas, cum diu frustra quaesivissem, tandem ea, qua est, humanitate earum mihi usum indulgit Vir eximius, Abrahamus Gronovius. Non id mihi sumo, ut de opera, quam hi Duumviri Celsi navarunt, judicium feram. Tantum dicam, Constantinum nonnullas Caesarii notas, nulla ipsius mentione facta, totidem verbis in annotationes suas transfudisse. Quod quo animo ab eo factum sit, equidem non dixerim. Quamquam scio, hominem jam ab aliis in atrum plagiariorum indicem esse relatum, ob idemque crimen in Scaliger. prim. p. 12. male audire. Interim nos hasce notas, ut

* 4.

116

P R A E F A T I O.

ne bis eodem loco extarent, e Constantinianis sustulimus, suoque reddidimus auctori. Venio nunc ad notas Literatorum Principis, Josephi Scaligeri, quas nunc primum foras dari vides. Fuit quondam ea felicitas Jo. Antonid. Lindenii, ut illud ipsum exemplar, cui Scaliger manu sua Animadversiones adscripserat, e Bibliotheca Vorstiana depromptum oculis usurparet. Quamquam nihil eorum, quae illo libro continebantur, nobis imperiuit. Postea idem exemplar e Bibliotheca Vorstiana in Graevianam videtur pervenisse. Is certe, qui Graevianorum Librorum indicem confecit, venditat nobis editionem Celsi Lugdunensem 1587. 12. cum MSS. Scaligeri. Sed cave temere assentiaris. Nam, ut Lindenius refert, Scaliger emendationes suas margini editionis 1554. 12. allevit, eamque Aelio Everhardo Vorstio testamento reliquit. Puto igitur, aut editionem illam, quae in Bibliotheca Graeviana venit, Scaligeri ἀντιγραφοῦ plane non exhibuisse, aut in annorum numero designando esse peccatum. Jam etsi nobis non licuit esse tam felicibus, ut librum ipsius Scaligeri manu conscriptum nancisceremur, obtigit tamen nobis exemplar in Bibliotheca Leidensi inter Libros Vossianos, cujus nos minime poenitere debet. Fuit illud quondam Francisci Vertuniani, viri & Graece doctissimi & Scaligero amicissimi, qui ex hujus libro Castigationes omnes in suum exemplar transcripserat. Idem in Epistola Dedicatoria, quam Hippocratis libro de Capitis Vulneribus praemisit, memoriae prodidit, Scaligero tum nihil antiquius fuisse, quam ut Celsum a tot tantisque fecibus, quibus eum superiorum temporum barbaries contaminaverat, quoad ejus fieri posset, repurgaret. Quo quidem in institu-
to

P R A E F A T I O.

to si viro divino perseverare libuisset, nae ille Lindeenios, Almeloveenios, Morgagnosque, viros doctos illos quidem & acutos, sed huic Augiae stabulo expurgando minime pares, longo post se intervallo reliquisset. Interim his, quae fors obtulit, fruamur, quae certe sunt ejusmodi, ut a nemine alio, nisi qui diuturnam cum priscis auctoribus familiaritatem contraxit, profecta videri possint. Scalligeri vero nomen ne quid detrimenti ex hac editione caperet, notas hasce, antequam operis traderentur, subjecimus judicio Tiberii Hemsterhusii, Viri laude nostra majoris, qui nobis pro eruditione ea, quam norunt omnes, optime de iis judicare posse videbatur. Ille igitur plerasque, quae ederentur, dignas putavit, nonnullas, quae tanti viri eruditioni parum respondere viderentur, ceris relinqui jussit. Atque haec fere sunt praecipua novae editionis ornamenta, quae, ut tibi eorum ratio constaret, paulo latius persecuti sumus. Reliqua, quae hic comparere vides, loci videlicet Hippocratis & Celsi Paralleli ab Henrico Stephano collecti, itemque Variarum Lectiones nunc primum sub textum revocatae; ea non sunt tanti, ut propterea ambitiose monendus esses. Vale igitur, Benevole lector, nostrosque de literis bene merendi studio fave.